

# E carera politico impresionante di Henny Eman

**HENNY** Eman ta masha stima y admira pa tur cu a conoce y conoce su historia politico. Henny, yiu mayor di Shon A Eman y Blanche Eman-Hartog, a nace den un famia unda politica tabata na ordo di dia. Welo di Henny, esta Henny bieu, su tata Shon A y prome cu nan su bisawelo Cornes Eman ta esunnan cu a cende e mecha di e lucha di Aruba su autonomia. Nan a construi e fundeshi fuerte cu a resulta den nos Status Aparte na 1986. Henny desde chikito tabata prepara pa drenta politica un dia.

Mescos cu su tata, Shon A, kende a fayece demasiado hoben, Henny a studia ley na Leiden cu e pensamento cu'n reto grandi tabata ward'e asina e caba su estudio. Na inicio di añanan 70 Henny a haya noticia for di Aruba cu e partido cu su welo a funda tabata confronta problema grandi. Tabatin un kiebro den partido. Henny a bin Aruba pa pone partido AVP bek riba pia y rescata e lucha, e anhelo di ta "baas den nos mes cas" cu tanto e pueblo di Aruba a bringa p'e. AVP tabata kibra. Henny hunto cu Alicia Quandt y Chibi Croes den un triumvirato a guia e partido na 1977 logrando 1 asiento.

Despues di eleccion Henny a bay bek Hulanda, caba su estudio cu Status Aparte como tema di su tesis y a regresa mesora Aruba pa sigui den politica y mantene e lucha di autodeterminacion bibo.

Na 1979 partido a haya 1200 voto di cual mas di mita tabata riba nomber di Henny. Esaki tabata muestra cu pueblo a scoge pa e politico hoben cu ideanan nobo. Na 1978 Henny e keda elegi como lider di AVP. Henny a reorganisa e partido den forma structural. A lanta varios comision, a institui un archief di miembresia y a logra haya esunnan cu a bandona partido bek. E cantica 'Ban Cas bek cu AVP' ta ilustrativo p'e tempo ey. Status Aparte a bin bek como tema principal di partido AVP. Henny no a logra solamente pone su partido bek riba pia, pero tambe su isla natal ora na 1986 el a keda eligi



como e prome Prome Minister di pais Aruba, esaki despues di a convence Hulanda y Antias cu e anhelo di su pueblo, esta su derecho di autodeterminacion ta algo sagrado.

Aruba tabata pasando den momentonan dificil, pero cu su Plan di Rescate Henny a logra sana e situacion economico financiero y social di Aruba. Rondona pa experto capacita riba tur tereno Henny y su team di rescate a pone Aruba riba mapa mundial. Henny a haya admiracion total di tanto Reino como di lidernan mundial pa e rescate milagroso di Aruba cu tabata pasando den su pio momentonan ora el a tuma rienda di e isla aki.

Te dia di awe nos tin probecho di su vision, su determinacion, su positivismo y su firmesa. Henny tabata Prome Minister di pais durante tres periodo. Un persona humilde cu nunca a gusta buya, un hende no-nonsense, pero semper skerpi den tuma decisionnan dificil. Su vision ta keda algo legendario. Partido AVP sigur lo haya su falta. Su guia y su consehonan valioso ta keda como ehempel pa futuro generacionnan di politico.

